

# Pomornici i galebovi

*U hipotetskom rodoslovnom stablu živućih evropskih ptica, RED ŠLJUKARICE - KARADRIIFORMES, koje su posmatrane i zabilježene (u posljednjih stotinjak godina) na području Bosne i Hercegovine, nalazimo 50 vrsta raspoređenih u osam porodica*

Pomornici ili otimači nasrtljivo i nesmiljeno napadaju druge ptice, npr. komorane, galebove, čigre, patke i druge vodene ptice i otimaju njihov plijen. Inače, prate ribarske brodove na moru i većim rijekama i hvataju riblje otpatke bačene preko palube.

**Porodica: pomornici**  
(*Stercorariidae*):

**33. Širokorepi pomornik**  
*Stercorarius pomarinus* (Temm.)  
njemački: *Spatelraubmöwe*;



**34. Kratkorepi pomornik**  
*Stercorarius parasiticus* (L.)  
njemački: *Schmarotzerraubmöwe*;

**35. Dugorepi pomornik**  
*Stercorarius longicaudus* (Vieill.)  
njemački: *Falkenraubmöwe*.

Gnjezdarice su i selice evropskog sjevera od Norveške, Finske i Rusije do Nove Zemlje. Gnijezde se u malim kolonijama ili pojedinačno na morskim obalama, otocima i jezerima, a na krajnjem sjeveru u arktičkoj tundri. Gnijezdo prave na tlu među kamenjem, mahovinom i



lišajevima. Sve vrste podjednako nesu jedno do trije maslinastosmedih jaja, prosječnih dimenzija 60 mm x 40 mm. Mužjak i ženka sjede na jajima 25 do 26 dana i brinu se za mlade čučavce koji se osamostale za pet sedmica.

Za vrijeme gniježdenja hrane se uglavnom leminzima (arktički glodavci slični miševima), jajima i mladima ostalih morskih ptica, hvataju ribu i male ptice, a jedu krupnije kukce i strvinu.

U gnijezdilištima se zadržavaju od sredine aprila do kraja avgusta. Pri selidbi dolaze i zimi se zadržavaju na mnogim evropskim morskim obalama kao i na većim vodama u unutrašnjosti, ali u većini zimuju u zoni Sredozemlja i na obalama zapadne Afrike.

U našoj zemlji su, prema podacima u literaturi, bilježeni pri selidbi u martu i od avgusta


do oktobra potkraj prošlog i početkom ovog vijeka (Reiser 1892. godine, R. Zaplata 1933. godine). Pošto su od druge polovine ovog vijeka (1961., 1978., 1983. i 1987. godine) opažani u unutrašnjosti Hrvatske, moguće je da su se pojavljivali i na našim prostorima, što je izmicalo pažnji posmatrača.

**Porodica: galebovi**  
(*Laridae*):

**36. Riječni galeb**  
*Larus ridibundus* (L.)  
njemački: *Lachmöwe*

Riječni ili obični galeb je odnedavno naša gnjezdarica i selica. Gnijezdi se na stajacićama i ribnjacima uz Savu i donje tokove rijeka Bosne i Ukrcine, moguće na odgovarajućim lokalitetima i drugdje.

Gnijezdo od bilja i korijenja





pravi većinom na tlu. Krajem aprila do početka juna nese dva do četiri maslinastozelena jaja sa smeđim pjegama (52,3 mm x 36,9 mm). Mužjak i ženka sjede na jajima i brinu se za čučavce koji su samostalni za šest sedmica.

Prehrana: ribe, žabe, vodeni kukci, ličinke, crvolike životinje.

U području gniježdenja boravi od aprila do septembra, zatim se skuplja u velika jata, te za selidbe jednim dijelom dolazi na vode u unutrašnjosti, a većinom ne obale jugoistočne i jugozapadne Evrope i Sredozemlja gdje i prezimljuje. Također, redovito je bilježen zimi na jugu, a povremeno u unutrašnjosti zemlje gdje, inače, ne gniježdi.


**37. Mali galeb**  
*Larus minutus (Pallas)*  
njemački: Zwergmöwe

Ovaj galeb je gnjezdarica i selica umjerenog evropskog sjevera, u biotopu tresetišta, travnatih močvara i stajačica s obiljem vodene vegetacije. U području gniježdenja zadržava se od maja do avgusta. Pri selidbi i zadržavanju opažan je u mnogim evropskim zemljama, a zimuje većinom u Sredozemlju.

Na našim prostorima bilježen je na proljetnoj selidbi od marta do kraja aprila, a na jesenskoj od avgusta do novembra. Na jugu zemlje opažani su pojedinačni primjerci ili manja jata i zimi (decembar - februar).

**38. Crnoglavi galeb**  
*Larus melanocephalus (Temminck)*  
njemački: Schwarzkopfmöwe

Ova vrsta gniježdi se uglavnom na jugoistoku Evrope, u



lagunama, na slatinama i ušćima rijeka, te uz velike stajačice s obilnim biljem. Selica je, a u gnjezdilištu boravi od maja do septembra. Zimuje u području Sredozemlja.

U našoj zemlji bilježen je pri selidbi u martu i aprilu, te u oktobru i novembru, uglavnom na krajnjem jugu.

**39. Srebrnasti galeb**  
*Larus argentatus (Pontoppidan)*  
njemački: Silbermöwe

Srebrnasti galeb ili klaukavac gnjezdarica je i selica gotovo na svim obalama evropskih mora i slatkovodnih jezera u unutrašnjosti. U području gniježdenja zadržava se od aprila do avgusta. Sjeverne i sjeveroistočne populacije zimuje većinom na jugu kontinenta i afričkim obalama. Gnjezdarice južnijih predjela su uglavnom stanarice.

Na području naše zemlje,

podjednako na jugu i u unutrašnjosti, redovito je bilježen izvan sezone gniježdenja. Na Savi i okolnim stajačicama od Broda do Šamca, te na ušćima Bosne i Ukrine pojavljuje se od sredine avgusta ostajući sve do smrzavanja voda. Promatrani su pojedinačni primjerci ili manja jata redovito od 1980. do 1990. godine.

**40. Galeb čukavac**  
*Larus fuscus (L.)*  
njemački: Heringmöwe

Ova vrsta gniježdi na sjeveru, sjeverozapadu i jugozapadu evropskog kontinenta, uz morske obale, riječna ušća i slatkovodna jezera u unutrašnjosti kopna. Djelomično je stanarica, ali većina zimuje na istočnim obalama Sredozemnog mora, Perzijskog zaliva do istočne Afrike.

U našoj zemlji bilježen je pri selidbi u martu i aprilu, te od



septembra do novembra, češće na jugu nego u unutrašnjosti. Skorašnja, ali rijetka opažanja potiču iz Hutovog Blata i donjeg toka Neretve (1962. - 1970.).

**41. Olujni galeb**  
*Larus canus (L.)*  
njemački: Sturmmöwe

Ovaj galeb je gnjezdarica srednje i sjeverne Evrope, na morskim obalama i uz velike rijeke, jezera i ribnjake. Često se gniježdi u društvu sa srodnim vrstama. Srednjeevropske populacije su u većini stanarice dok ostale gnjezdarice prezimljuju na jugu kontinenta.

Kod nas je bilježen za proljetne i jesenske selidbe, kao i na zimovanju, od novembra do aprila. Zadržava se na vodama u unutrašnjosti i na jugu zemlje. Dolijeće pojedinačno ili u malim grupama.

**42. Veliki (burni) galeb**  
*Larus marinus (L.)*  
njemački: Mantelmöwe

Veliki galeb je sjevernoevropska gnjezdarica. Gniježdi se u malim kolonijama, na niskim kamenitim morskim obalama i otocima, rjeđe uz jezera u unutrašnjosti kopna. U gnjezdilištu se zadržava od maja do septembra. Zimuje južno, do Sredozemnog, Crnog i Kaspijskog mora.

Na prostorima Bosne i Hercegovine bilježen je kao rijedak gost. U literaturi postoje podaci o njegovoj pojavi krajem prošlog vijeka (Reiser 1892. godine). Italijanski lovac (K. Pollato) iz Milana odstrijelio je jedan primjerak na Hutovom Blatu u decembru 1968. godine.

